

Trenutne političke poteškoće se mogu riješiti

Daljnji međunarodni angažman u Bosni i Hercegovini će pomoći u stvaranju države koja će biti stabilna i sigurna i koja će biti u stanju da institucionalno rješava vlastite probleme, visoki predstavnik Valentin Inzko izjavio je danas u Londonu.

U razgovoru sa britanskim ministrom za Evropu Davidom Lidingtonom, visoki predstavnik je rekao da ujedinjena međunarodna zajednica može pomoći u rješavanju trenutnih političkih poteškoća u Bosni i Hercegovini ako nastavi aktivno pružati podršku konstruktivnim alternativama zastoju i ekonomskom nazadovanju do kojih je došlo u nekoliko posljednjih godina.

On je rekao da su građani Bosne i Hercegovine oduvijek pokazivali sposobnost da grade praktičan konsenzus koji prelazi granice među zajednicama, a međunarodna zajednica mora pokazati solidarnost sa četiri miliona građana ove zemlje istovremeno pomažući njihovim političkim liderima da odbace konfrontaciju i prigrle kompromis.

“Politički sporazum koji su postigli šestorica političkih lidera u decembru 2011. godine stvara nadu da se energija sada može usmjeriti na oživljavanje bosanskohercegovačke ekonomije i vraćanje zemlje nazad na put ka Evropi”, rekao je visoki predstavnik. Političke stranke koje su dobile podršku građana na izborima u oktobru 2010. godine moraju pokazati da su u stanju formirati funkcionalnu vladu, kao i podržavati Dejtonski mirovni sporazum, Ustav i vladavinu prava.

Visoki predstavnik je rekao da je Velika Britanija uvijek bila na čelu napora u pružanju efikasne podrške narodu Bosne i Hercegovine, te da ova pomoć predstavlja dio opsežnog poduhvata koji će uspjeti na dugoročnom planu.

Kako bi došlo do uspjeha, rekao je on, međunarodna zajednica mora podržavati institucije BiH tako da one mogu poštivati osnovne evropske principe slobode, demokracije i vladavine prava, bez obzira koliko se politička klima mijenjala.